

高生於下

李曰九重之臺起於臺土

速生於近

李曰千里之行始於足下

外生於內

李曰由內故有外也劉曰言出乎外行加乎民

貴生於賤

李曰因卑以至尊也劉曰貴以賤為本

動生於安

李曰因靜而有動也劉曰安其身而後動

盛生於衰

李曰熱極則寒劉曰日中則昃

陰生於陽

章曰陰陽猶死生也夫天下同善而無惡

同利而無害者則善之名無因而生然則

善名由有惡而生利名由有害而生凡此

上事皆是有欲有私之患也李曰靜極則

熱劉曰命呂則律

是故有無之相生虛實之相成

李曰有生於無無生於有故曰相生虛者

陰也實者陽也熱極寒實成虛也靜極躁

虛成實也故曰相成劉曰有之以為利無

之以為用

是以有歸有無歸無也

章曰有善則有惡是有歸有也無利則無

害是無歸無也劉曰本乎天者親上本乎

地者親下

西昇經集註卷之五

西昇經集註卷之六

維六

華陽書虞吉 句曲徐道進 冲玄子

任真子李榮 劉仁會 註

碧 虛 子 集

在道章第三十二

老子曰人在道中道在人中

李曰道則大無不包人則非道不生故知

人在道中也道有細無不入物無不在是

知道在人中也

魚在水中水在魚中

劉曰人之神氣天地交通也方彼遊魚內

外資水

道去人死水乾魚終

李曰此舉喻也魚之於水猶人之於道道

在則人存道去則人亡水有則魚生水無

則魚死人必須歸道魚定當歸水故曰人

相造乎道魚相造乎水水之與道人之與

魚不可暫失矣

故聖人自知反歸未生捐棄憍奢絕除憂怠

章曰捐棄憍奢然後絕除憂怠憂怠既除

然後能反未生未生既反則道留而長存也李曰自知者不可思須失道也反歸未生抱守於本捐棄憍奢去泰去甚絕除憂思無欲無愁以道實心何憂之有是故形隱神留

劉曰冥然不動天下歸焉

韋曰隱安也形能安神故神亦留止於形也冲曰同世之形託死隱變精神之身留世化物天下慕德皆來從歸也李曰疑神九重故言形隱道在聖德故曰神留風而至慕道而來萬方朝覲天下歸焉劉曰歸其靜也

無為無事國實民富保道畜常是謂玄同

李曰法令滋彰盜賊多有不用奸智名曰

無為不飾兵戈名曰無事不以有為撓物常以無事安仁任用賢哲百姓繁昌國實却被走馬以事桑田財足穀多故云民富守於真正故云保道因循日新是曰畜常保道得道畜常得常達於常道故曰冥同

也劉曰主上無為群生安業儲積充實而民富貴至理之道如此

有國章第三十三

老子曰有國者其根深也

韋曰王叅四大繼天理物當與道同根無

為也李曰以道為根所得深矣

天地覆載萬物畜養金玉重寶不積留也

韋曰天地無為於覆載故常覆載是以藏

金於山藏珠於淵則重寶無所逃其域矣

矣假積留於府藏哉李曰夫有國者宜以

道為根德為本德無不被道無不通為天

地之所覆載保其清寧萬物之所養育獲

其長久不須積聚金玉而金玉自然留止

也劉曰天地自覆載萬物自畜養聖人根

深寧極金玉重寶一氣所須是棄而不用

也

夫外天地者有天地外其身者而壽命存也

李曰外遺忘也用之有為而天下失行道

之德而天下存故言有也以生為有愛養

傷生故其身亡也能忘於身身將道合壽

命無極故其身存也劉曰夫遺天地者無事無事者則物歸之遺形骸者無欲無欲者則命存矣夫天地形骸尚自外之金玉重寶何足留意也

是以君子善人之所不喜善人之所不喜樂

人之所不樂為人之所不為信人之所不信

行人之所不行是以道德備矣

李曰至學之士學人之所不能學立行之

者為人之所不能為為與不為皆為學與

不學皆學教無不達理無不通故曰道德

備矣細而言之常俗小人所好者有為懷

道君子所好者無為此善人之所不善也

人皆悅於聲色我獨悅於無聲無色此喜

人之所不喜也人皆愛於名利我獨忘於

名利此樂人之所不樂也人皆作憎愛我

獨作不憎不愛此為人之所不為也人皆

信邪我獨信正此信人之所不信也人皆

行惡我獨行善此行人之所不行也道與

俗反志遠功高事無不圓故云備矣劉曰

善者善無情也喜者喜無事也樂者樂無

味也為者為無為也信者信無心也行者行道德也夫此六句亦有義焉解行不然也道德不備也

皆有章第三十四

老子曰道非獨在我萬物皆有之

韋曰道無不在豈聖人獨有而萬物皆無哉莊子云道在屎溺屎溺猶有其道而況萬物者乎劉曰所明道無不在修者得之萬物不自知道自居之

冲曰萬物無知情均芻狗不知聖匠剖大混一朴散為無窮之物不能自知生本由道氣合生物道自居之劉曰藏諸用也

衆人皆得神而生不自知神自生也

韋曰但不自知又不知物則神道自然冥會也冲曰神為生形之本衆皆得而生不

自知生我者神神自生我也劉曰近在諸身而不能知

君有德施於百姓百姓不自知受君之德也冲曰君有無為之德施於百姓百姓得其自為日用不知謂我自然不知受君之德

也韋曰上不知下下不知上上下下相忘乃為道治也劉曰功成事遂百姓皆為我自

是故聖人藏神於內魄不出也

冲曰聖人知生我者神故養神守身藏神形內煉形化魄合於真神混而為一不役寬魄又何出焉李曰魄寂也輕躁之徒其神自離聖人法道安靜無為神不離身寂然在內故云不出也劉曰靜之至也

守其母其子全

李曰保道存神守其母也於身無害其子全也

而民熾感保其國也

劉曰本固邦寧

玄虛積充壽命長也

冲曰玄虛者道也真積妙氣積充我身故能飛行空虛壽命長久也

人能徒知天地萬物而不自知其所由生反命歸本是大不知也

韋曰命者自然也本者道也我都無知故

能歸一反於自然也李曰有靈之中人最為智測之於景親之於天察之於地通之物理無有不知是稱為智而不知身由道生歸根反本而守愚至死信命將終是大不知也劉曰謂假學之流雖復窮教盡藝辯智多能奇伎異端規模聖軌而不悟生之所由反命歸本之道而逐於外者於世雖得其美名於身是謂愚焉

治身章第三十五

老子曰治身之道先隱天地靜居萬物之始韋曰隱安也先安其身形如天地之無為然後能心居萬物之始始也者道也李曰修身之理必先忘於形形有既忘都無所見此隱於天地也然後息心歸本居於萬物之始也劉曰天地尚隱何所見焉居物

之始何所有焉

夫聖人通玄元混氣思以守其身

徐曰聖人常清靜無為故能通玄元之道

混合神氣思念真神以此守真故能長存

久視也劉曰崩元通而不墮氣思混而不

亂以此守真是聖人之道也
俗人以情愛貪欲以守其身

劉曰情愛深於溟渤貪欲重於丘山如此
守身惡人之趣也

此兩者同有物而守其身其道德各異焉

劉曰聖智愚情兩行相反俱專事業為用
不同美惡二途功滿則方効也

道德章第三十六

老子曰道德天地水火萬物高山深淵各有
所歸之

李曰道德是幽微之理天地已下是有形
之事有象之物猶各有所歸喻無形之道

若能無心去欲道亦當自然而至

夫道非欲於虛虛自歸之德非欲於神神自
歸之

李曰道既虛無德亦神妙虛無神妙必竟
清靜而人若能虛心無身自然歸道抱神

守妙自然歸德也劉曰虛歸於道神歸於
德道以虛往德亦神歸

天非欲於清清自歸之

劉曰輕清者上昇也

地非欲於濁濁自歸之

劉曰重濁者下沉也

濕非欲於水水自歸之

劉曰水流濕也

燥非欲於火火自歸之

劉曰火就燥也

萬物非欲見於形形自見之

劉曰無相者不能見也有形者不能隱也

高山大澤非欲於飛鳥虎狼飛而虎狼自來

歸之

劉曰羽族毛羣必歸林藪

深淵河海非欲於魚鼈蛟龍魚鼈蛟龍自來

歸之

劉曰類聚羣分各有遊處

人能虛空無為非欲於道道自歸之

劉曰有用者事寬無為者道歸

由此觀之物性豈非自然哉

劉曰物類相感非由情割

善惡章第三十七

老子曰百姓行善者我不知也行惡者我不
知也行忠信者我不知也

徐曰四民皆有自然之性苟無根性難可
化諭猶如鳥黔鵠白非染浴之功也李曰

聖人運慈悲之意開化導之方咸令捨惡

業而達善因去虛妄而行忠信而達途難

曉失路不歸各隨生業任其顛倒不能虛

忘罪福競生善惡行善者致賞行惡者被

刑忠信者則是賢臣譎諛者便為狂賊並

由行有善惡而名有是非本非是衆生所為

非聖人所知者也此為權教事至自悟故

言不知耳

是以積善善氣至積惡惡氣至

李曰前以權法語曰不知任彼愚情恐惡

根未絕故將此實教勤勤曉示善不積不

足以成名惡不積不足以滅身故知積善

善至積惡惡來皎然非虛信之影響明言

此者心欲捨惡歸善也劉曰明聖人無心

應物而已善惡自積孰知之哉

是故聖人言我懷天下之始復守天下之母

而萬物益宗以活其身

李曰我懷天下之始抱道也復守天下之母含德也道德在內為人所尊故曰益宗物能歸道道德能濟物人物得存故云以活其身劉曰潔源者流清守母者子瞻

吾意常不知

劉曰知即非守母之道也

安能知彼行善惡焉

李曰聖人內忘於身則無人無我故云吾意常不知外忘於物亦無善無惡彼此並皆都忘何能知彼之行善惡也劉曰守母尚自不知安更知子所作

積善神明輔成

韋曰積善以感神明神明自然成輔亦我不知也

天道猶枯於善人

韋曰天道無親常與善人天亦不知者也

寂意章第三十八

老子曰吾道悒悒寂

韋曰死灰枯木之謂也

意死者生靜而復命也

韋曰雖不失其生意同死人也故能無時不生以其意死寂然故能復其自然之命也冲曰意死猶灰心也

生積浸潤滋酌留滯

李曰靜心息意以道生生故曰生生道流不絕久潤於身故云積浸玄津法水是謂滋酌流注己身有礙故名滯為道所止故云留也劉曰積聚氣血將以為身生生之義如此

玄冒沾洽

劉曰玄冒謂覆被形骸也沾洽謂津灼道流開諸關脉也

元氣包之

李曰息意有為而生自存靜心歸道而命自復以能歸道為道所覆故曰玄冒靈液流潤故曰沾洽人之受生本緣元氣愛精保氣氣不離人人得氣生為氣所裹故曰包之劉曰生者雖曰神功非氣無以化育其根益深

韋曰冒覆也言萬物之生積浸和氣之滋

酌留結玄冒而沾洽也又有元氣裹之故其根益深與道同本冲曰灼如人手足液也冒覆也學人抱元守一以其神氣積充浸潤一身滋液津灼留滯百骸玄道覆薰沾洽內外元始道氣包裹我形萬氣長存真神栖鎮所以生根益深長生久視也乃四固

中無心

劉曰真性綿邈形骸不虧

韋曰得地水大風故能堅固以成其身冲曰塞兌閉門耳目口鼻四情堅固塵境不得入中心空無也故能致萬物精華

韋曰雖四物成其身而其中寂然同於無

心是以萬物精華莫不歸之李曰玄道所覆元氣所包道遠氣長故曰其根益深深根寧極身外則存四大不毀乃云四固忘情虛已內外清淨湛然空寂名曰無心身心既忘絕諸羣有契虛無之境得杳冥之

精故曰致萬物精華也

無極之物自然來歸之

冲曰學道之人精修行氣故萬物齊仙霞精光華玄景希夷微妙無極道無自來歸也

以其空虛無欲固也

李曰有形之物並為羸惡無極之物是曰精華無極精華是為真道來歸已何以致然皆由清靜空虛所以自然而生矣

戒示章第三十九

老子曰喜吾重告爾古先生者吾之身也

冲曰老子十號一號古先生又應號記及顯迹記並云上三皇時號古先生此即明老君之身歷代行化當過關之時寓記此言以誠尹公故稱開導生乾指言升就及尹公師稟受道傳授五千文付以九丹訣又授九室之要將化西土升入太微欲重訣言以解其惑故却告言古先生者吾之身也所以祛尹公之疑示西化之兆矣後人妄改云古先生者吾之師也一何謬乎

且帝王年代記所推老君又王受命之年

太歲丁卯下為周師昭王時宅關二十五

年癸丑與尹公說經二十六年四月升入

太微二十九年尹公會蜀青羊肆重見老

君遂化西國後人妄云平敬幽厲定王之

時西入流沙亦皆謬耳何者尹公是周康

王大至昭王時請出為關令以候老君

非平敬之時明矣

今將返神還乎無名

李曰無名者是寂境之常道也隨機導物

從真起應名為降德化緣既息攝迹歸本

故曰返神來則於無象而示有象還則自

有名而返無名故曰還於無名

絕身滅有綿綿長存

冲曰神者靈妙之稱也返靈妙之神還於

玄虛歸於空寂無名無形絕同世之身滅

有形之體成無上道綿綿若存也李曰息

化去應名曰絕身滅有法身不動真道疑

然是曰綿綿若存

吾今逝矣亦返一原

李曰逝往也老君從東往西故云逝矣真

法無一正道唯一從東而來還歸於道是

亦返一原矣

忽焉不見

劉曰存亡自在非常情所測

斯須館舍光炎五色玄黃

冲曰館舍莅事所歸也老君在周和光世

俗微迹微藏觀化風塵藏人於人人莫之

識欲息迹返原解形遊化是以忽焉不見

斯須之間館舍光明照耀內外五色玄黃

驚駭視聽也李曰斯須俄頃也老君神妙

不測道力自然於有能不有則忽焉不見

不有而能有則放光五色映照十方示以

神變者今以戒受也

喜出中庭叩頭曰願神人復一見授以一要

得以守元

冲曰既觀神變方知大聖是以出於庭中

叩頭頓顙唯願神人重復一見雖蒙教誨

旨遠途多莫知所從故重一要得以抱一

守元也

即仰視觀懸身坐空中去地數十丈其狀金人存亡恍惚老少無常

李曰良願既發玄聖非遠仰視天上即觀老君端坐虛空去地高邈容儀非彼皓首形狀絕是金身或無或有故云存亡恍惚

非大非小故曰老少無常

曰吾重誠爾爾其守焉

榮曰再敷妙法觀令保道

除垢止念靜心守一

李曰有為紛累人間穢濁浪生分別妄起。愛憎皆染汙人咸稱曰垢制情忍色達有通無並悉蕩之故言除也意無所繫故云止念內外弗著故為靜心凝神於道用志不分故名守一劉曰凡非真性者皆是垢夫止念慮衆垢方除守一不動真心乃靜也

衆垢除萬事畢

李曰百惡銷曰除萬善具曰畢

吾道之要誠警竟即隱

李曰前請抱元守一誠以除垢止念邪念

息正業與可以成真可以得道可以理家

可以化國事無不可故云畢玄元應物本在教人人依教行理無不濟物濟人度德克化給遯形入寂故云隱

喜不知所之泣涕追慕退官託疾

李曰聖師入妙莫測所之仰德故流涕思慕去於有事歸以無為故寄偈託疾也

素念守一萬事畢矣

李曰素戒在心依經立行更不外緣是名守一有累之塵既盡無為真道自成智滿

德充萬行皆備故云畢矣

西昇經集註卷之六

廿六

十五

關尹子

維七

關今尹喜周大夫也老子西遊喜望見有紫氣浮關知真人當過候物色而迹之果得老子老子亦知其奇為著書喜既得老子書亦自著書九篇名關尹子今陝州靈寶縣太初觀乃古函關候見老子處終南宗聖宮乃關尹故宅周穆王修其草樓改號樓觀連老子祠道觀之興實祖于此老子授經後西出大散關復會于成都青羊肆賜號文始先生所著書後為文始真經